

Finanziamenc da la Region per la mendranzes linguistiches

La jonta regionèla à aproà na lingia de intervenc te la valèdes ladines e la adejions ai istituc mochen e cimber, con la sodesfazion de l'assessor Detomas



L'assessor regionèl a la mendranzes linguistiches Giuseppe Detomas.

La jonta de la Region Trentin Sudtirol se à binà a Trent ai 21 de dezember per tor dant na lingia de intervenc proponec da l'assessor a la mendranzes linguistiches, Giuseppe Detomas.

L'esecutif à deliberà l'adejion a l'Istitut cultural ladin Cesa de Jan con senta a Col de Senta Luzia per na soma de 75.000 euro e a l'Istitut Cultural Ladin "Majon di Fascegn" con senta a Sèn Jan per n'emport de 120.000 euro.

Apede a chisc l'è stat aproà ence na adejion con 80.000 euro per un ai doi Istitut de la mendranzes

germanofones de la provincia de Trent: l'Istitut Kulturinstitut Lusérn, l'Istitut cimber con senta a Luserna, e l'Istitut Bersntoler Kulturinstitut, l'Istitut mochen con senta a Palù del Fersina.

En ùltima, semper chel che vèrda i Istitut de cultura, l'è stat aproà n contribut a la speises de 50.000 euro per l'Istitut Micura de Rù de Sèn Martin te la Val Badia.

La jonta regionèla, vidèda dal president Arno Kompatscher, à aproà ence stanziaments en cont capital per vèlch intervent, più avisa per la senta de la Musega de Moena, per l'restaure e la recuperazion de la Ciasa

de la Monaria a Sèn Jan, per l'nef òrghen de la geja de La Ila te la Val Badia e per restaurèr e orir da nef la galaria de la ferata a Senta Crestina Gherdena.

A la fin de la sentèda de jonta l'assessor fascian Detomas à palesà sia sodesfazion per l'aproazion de chisc intervenc, "che i conferma - l'à dit - l'empegn de la Region tel finanzièr ativitèdes per l sostegn a la mendranzes linguistiches. Chestes defat - l'à sottrissà amò Detomas - les raprejenta n gran patrimoniè e n element identificatif prezios de noscia tera."



La restruturazion de la Ciasa de la Monaria a Sèn Jan l'è anter i Intervenc finanzié da la Region en cont capital.